

福建通志列傳補編

地 310  
367  
i/



福建通志列傳補編目錄

林嗣環

黃熙纘

王命岳

陳允錫

弟碩奎

子善

劉璽

崔秉鏡

藍理

廖騰燿

鄒尚仁

弟尚易

蔡世遠

福建通志列傳補編

目錄

莊亨陽

羅均

郭廣武

徐居敬

梁上國

胡貴

子振聲

蔡攀龍

孫全謀

邱良功

李日燦

子光斗

鄭大經



許鼎

余士前

羅廷鳳

丁應三

陳克明

吳洪欽

吳沙 潘賢文

何琦

蔡元真

福建通志列傳補編

目錄

二

福建通志列傳補編

仁和陳善扶雅甫著

林嗣環

林嗣環字起八號鐵崖由安溪徙晉江崇禎十五年舉人順治六年進士從尚耿二藩率師收粵下廣州釋民之陷賊者七年分巡雷瓊道先是賊首羅成基佔民田民代輸稅賊平產入官稅仍在民嗣環請清理之瓊州向有派役之例值者苦之嗣環爲均其役又禁株連及錮婢投充諸弊并禁民借營兵錢民便之性耿介峻風裁時有馬伽沙賈舶抵朱崖主帥利其貲將執戮之嗣

福建通志列傳補編

一

環曰吾以書生

超拜爲副使巡海外職在來遠人綏荒服攘功挑釁誓不敢爲帥銜之卒無以奪其議聽賈人歸國時二藩有異志欲集餉嗣環議行屯田拂其意共嫉帥劾之被逮因陳藩兵不法事由是移耿藩於閩嗣環落職寓西湖一時海內名流如朱彝尊宋琬王士正爭相推重旣歿葬西湖白沙泉右瓊人又祀之包拯祠嗣環爲文章光怪百出讀之增氣著有鐵崖文集詩集海漁編嶺南紀畧若干卷

黃熙纘

黃熙纘字俞維號傲菴晉江人順治十一年舉人授安慶府推官有大猾某竄籍通貴倖爲民患上官莫敢問熙纘設法鉤斃之能聲四振鄰封冤獄皆來求質多平反權府事會海寇犯瓜州鎮江失守遂分兵爲二一踰揚州一度宣歙而安慶孤懸上流衆心疑懼熙纘招集散亡厚撫士卒教以作止衝伏之法遂登陴固守時有持僞檄至者縛置獄中賊至開門躍馬揮士卒奮擊瞬息奔潰值江寧亦戰勝賊退伏無所流桐潛問犯黃荆笨熙纘夜馳擊之俘獲無數降僞總兵僞副將七人又降賊衆數千安慶以靖於是督撫議遣兵戍安慶熙纘

以流離初附不堪重困格其議民得安堵以功授三等阿達哈哈番世襲四次入爲刑科給事中轉禮科丁內艱歸服闋赴京凡途中見聞悉記載爲入告地而疾漸劇卒於官年四十三

賜祭熙纘博學工詩所著有諫垣奏議栖霞山記子基巖襲職

王命岳

王命岳字伯咨一字恥古晉江人受易於漳浦黃道周順治十二年成進士改庶吉士未散館授兵科給事中命岳少負大志自錢賦漕輓邊儲徵調徼塞以及軍伍

之虛實敵情之向背靡不周知至是感時事上經國遠慮疏曰國家所最急者財也今歲入千八百四十一萬有奇歲出二千二百六十一萬有奇出浮於入者四百四十七萬有奇此四百餘萬者卽竭盈朝之心計以臣度之不能至數十萬而國體已傷民力以竭甚非長策也臣因通計國用所以不足之故皆由養兵耳各省鎮滿漢官兵俸米草苴之費至千八百三十八萬兩餘大兵所過芻秣之費約百四十萬兩其在京王公及百官俸薪披甲月餉不過二百萬有奇耳則是歲費二千二百萬餘兩者凡十分在養兵一分在雜用也臣因思今日之事不宜再議剝削以給兵餉而當議就兵生餉之道今河南山東湖廣陝西江南北浙東西江西閩廣之地或因兵火或因水旱荒田極多宜令各省駐防官兵分地耕種稍倣明洪武屯田之法初年猶煩有司給與牛種耕具餼糧次年之後各兵皆自食其力便可不費朝廷金錢此其爲利甚溥而今日不得行者由於有兵冊無兵人也古者郡縣兵丁皆有什伍相配千百成旅將帥因而轄之耳今將帥所隸兵丁多以僕從充數下至廚役優伶皆應兵名其實能操戈殺賊者十不得二三也故食糧有兵充伍無兵官有陞遷兵隨官去旣無

定兵難議屯種爲今之計當先核兵每府各有定數之  
兵官有陞降兵無去來然後可給地課耕漸收富强之  
利如湖南福建廣西與賊相持之處數有震隣宜勿遽  
責耕種其餘各省平定之地及去賊二三百里而遙者  
皆可耕種以給兵食因人之力與地之宜一歲便可生  
財至千餘萬緣事體重大羣情憚於舉行故因循苟且  
不過議節省某款清察某項以爲生財之至計譬如盤  
水何益旱田臣見今日因賊而設兵因兵而措餉因餉  
而病民因病民而民復爲賊展轉相因深可隱憂故爲  
皇上籌經國之遠圖而不爲苟且目前之計要在力破

因循以實舉行斷無不可核之兵斷無不可耕之田斷  
無不可生之財論事甚艱課功甚近者也移戶科上疏  
極陳漕弊移兵科會楚中用兵江南浙江等省協濟軍  
儲數載猶不時應命岳言不如使浙江各省新舊正雜  
錢糧盡解京師而別撥淮浙鹽課及戶工二部關稅額  
銀如期解充楚餉爲有裨實用命岳每言國事輒以屯  
田爲急至是又疏請復軍屯衛官曰臣於十三年五月  
敬陳經國遠圖疏已議格矣今臣且亦未望諸臣以兵  
屯竊謂前明軍衛屯田之制田不可不清官不可不復  
也當洪武中養兵百萬不費民間一錢者恃有軍屯耳

今天下各衛所不具在乎各衛所食田之軍不具在乎一舉而清之國家可崇朝而得數百萬之餉可崇朝而得數百萬之兵臣請備言之自我

朝定鼎以來勝國指揮千百戶等官悉落職不襲官既落職軍獨擁田此於理爲不甚安矣又有典質於鄉紳富民之家者撥之國法益復舛謬雖曰今日屯田已派入民田納糧其實在勝國時屯以養軍亦未嘗不輸糧於官也勝國食屯之軍有百萬軍之用今日食屯之軍竟不得一卒之用豈不重可惜哉臣按天下屯田皆地極豐美歲足登收請按籍而稽其現屬舊軍管掌者報

名於官官給新帖人有限田歲時操練以備戰守無漕之地專禦封疆有漕之地更番運漕其有絕戶無人或有人而典質於富民鄉紳之家者許令自首以歸於官官選經制之兵以補受屯之軍亦人有限田歲時操練與舊爲伍如此則經制之兵不必處處皆設按屯之數可以得兵養兵之費不必仰給司農按屯之數可以得餉餉何患不足兵何患不强臣又觀今日漕事之壞皆由旗軍無世職之官統之故軍熟而官生軍猾而官懦今旣清屯田必復設指揮千百戶等官以本朝勞久功多之臣膺其任世其子孫無漕之地專固

封疆有漕之地即使領運官有長子孫之心卽有護桑梓之念而債帥虐民之患息軍有世管之官卽安受約束之條而奸猾偷盜之弊亡此臣所以因清屯而請設官也尋請專官清丈荒熟地畝曰謹按各省除荒之數歲縮銀五百五十萬兩有奇而除荒之地河南山東爲多二省冊籍不清尤甚他省間有以熟作荒者亦有以荒作熟者以熟作荒旣除荒之地是也田則連阡纒陌冊則水流草壘豪強收不稅之租公家喪維正之供如是者病國以荒作熟者則興屯之籍是也荒田旣已不墾乃取里中而均派之每田一頃令加一二十畝不等

於是設虛冊編假丁上下相蒙以欺

朝廷而真以熟作荒者反無稽察於是官報興屯之數以博一日之功名民受抑勒之害竟釀他年之逋欠如是者病民而究以病國夫

朝廷日議搜括議節省而虛棄此就地生財數百萬金錢以飽豪右之腹豈不痛哉大約各省以熟作荒居其八九以荒作熟居其一二而河南之弊甚於山東各撫按委擲故紙奉行無狀伏乞

皇上慎選御史臺中清正骨鯁不畏強禦者二人督察三省田地不理刑名不考貪廉惟嚴率諸州縣履畝清

丈編造魚鱗圖冊勿爲限期以盡其才丈冊旣繳不時  
親自行丈按圖覆核有昏耄聾瞶不能履畝者奏罷之  
有因仍前弊隱懷欺蔽者奏請擬罪有輕重不均賣富  
攤貧及騷擾里甲派取供應者奏請重治臣料竣事之  
後就此二省能爲

國家多增百萬金錢而包屯罔上之弊亦以一清其餘  
各省察其除荒多者如例均丈此足國宜民之大道也  
疏奏奉

詔舉行而命岳以請假葬親因上事宜十餘條曰發田  
賦文冊及丈地成規造魚鱗冊給關防定舉劾與官民

更始明州縣之界分荒熟之實嚴丈後之罰懸代丈之  
賞立虛丈之禁與科派之禁省騶從之煩與供億之費  
時雲南軍興歲餉九百萬兩有奇而總括一省正雜賦  
稅銀止十六萬一百兩有奇國計日絀命岳又上疏議  
兵屯以紓國用言古者趙充國辦羌且戰且耕諸葛亮  
伐魏且耕且戰此二臣者豈有大異今人不過視國如  
家鞠躬盡瘁則經濟自生耳憶臣入垣首議兵屯而封  
疆諸臣覈疏難之前事遂寢豈有能毅然爲

朝廷力行此事者無已臣復思其次按雲南原有舊屯  
計萬一千一百七十一頃有奇科種三十八萬九千九

百九十二石有奇皆現有原種之軍今當  
敕令巡撫令其責成原軍換帖種糧永爲世業軍旣領  
田卽爲我兵籍其丁壯復成勁旅如軍故丁絕招人代  
墾願爲軍者卽給新帖許爲世業不願爲軍卽爲官佃  
歲納官租兵燹之後牛稀種絕宜暫發撫臣二十萬金  
聽其買牛辦種借給軍民牛孳種收經年銷算二十萬  
金必無虧損又可以收復三十八萬九千九百九十二  
石之舊額不惟此也官收額內軍餘額外米粟旣登價  
直自賤倘邀天之庇每粟一石價可三金則視今年之  
每石十二金者已省

福建通志列傳補編

朝廷餉費四分之一矣況賤於此者乎惟是催徵之官  
宜責成本府州縣令其徵收或本或折仍照前朝萬厯  
則例一切濫加悉與蠲除庶人樂急公野無曠土屯事  
之成此其一又當嚴禁主客兵丁勿擾屯兵屯民邇來  
驕兵悍將自不肯耕以擾耕人則膽張眉動牙開爪攫  
卽現熟者猶去其鄉况新闢者誰不棄土必使撫臣得  
行其法然後耕人得保其業屯事之成此又其一至於  
民地荒蕪旣多其有主者給以牛種量收本色仍課正  
供其無主者一體募人耕耨收其西成屯事之成此又  
其一黔國世鎮雲南各府置有莊田不載有司冊籍宜

訪沐府經營舊員令其開報熟者收其籽粒荒者一體募人耕耨屯事之成此又其一臣惟平西王一意辦寇撫臣袁懋功一意辦屯庶幾兵食兼足不至竭天下之物力以奉一隅以釀禍患今時屆仲冬轉眼改歲臣及今不言則明年之計虛事在旦夕難可遲緩世祖可其奏發銀十萬兩聽督撫備牛種耕具修復舊屯所言乃見用矣當是時浙江右布政使員盡忠營私結援吏部奏遷廣東左布政使命岳特劾其貪穢請爲粵東殘黎驅除大憝

世祖褒嘆曰非王命岳莫敢言也

福建通志列傳補編

九

聖祖仁皇帝卽位奉使廣東卻尙藩贈金還遷刑科值朝議欲裁天下教官以佐兵餉命岳抗疏力爭乃止然卒以是被謫後畿輔大旱

詔求直言命岳自傷身在事外猶草民間利害諷近臣入告又時以強藩悍將世及爲憂嘗謂

皇上富於春秋宜幾暇披覽古今爲法戒乃錄夏商周以來至元明故實名曰千秋寶鑑書垂成未進而卒年五十九時康熙六年也至十三年而三藩叛

陳允錫

弟碩奎

子善

劉璽

陳允錫字子帥號壘齋晉江人順治初父鳴鑾知海陽

縣值提督李成棟叛不污僞職允錫與弟碩奎航海赴  
難父得生還碩奎旋卒允錫讀書過目成誦經史詩文  
靡不淹貫順治十二年定遠大將軍帥師入閩舉人才  
允錫試一等授德化教諭改扶風縣丞時縣令不治事  
大府欲去之以允錫代允錫曰縣令雖才短而廉使我  
得實心佐之事可不廢從之流寇肆掠縣令尉皆逃避  
允錫獨讀書衙齋寇至問何不去曰吾爲朝廷命吏與  
城存亡去將何之寇竒而去事定衆欲以聞曰得不爲  
令尉地乎卒不言丁內艱服除補掖縣丞移進賢未幾  
擢布政使都事遷平湖知縣裁漕糧羨餘息獄訟逾年

歸年八十四卒所著有十三經解二十一史緯諸子鈔  
古今詩刪古今文選壘齋集子善字孫敬以貢生効力  
長沙敘功授上海知縣奸民張恢事發逃匿波累甚衆  
緝獲置法悉免株連孀婦張氏孝於姑姑死以身殉夫  
族誣氏兄張玠迫妹謀貲立白其寃逆僕操舟害主以  
盜聞且曰某奔不及并被傷善問盜何操曰利斧驗僕  
傷詰曰盜乃持薙髮刀耶何痕長而傷淺也僕語塞服  
辜泣任九載決疑雪寃有神君之號以親老乞養終父  
喪補興寧知縣威惠兼施民猺感服論者謂其有允錫  
遺風焉初允錫之未遇也同里有劉璽者長古文詩歌

順治間養病於開元寺客有短陳允錫者璽方蒙被臥勃然起曰此奇士也君輩何足論人拂衣遽去後允錫讀書寺中與相遇詢姓名始定交館允錫百尺樓兩年允錫父鳴鑿遇亂璽偕允錫赴海陽鳴鑿歸遂以子畜之會泉州被寇璽無家可歸允錫奔走經營離合相間璽病卒鳴鑿葬之揭陽城西允錫至題其墓碑曰劉幼宰旅冢賦詩哭之幼宰璽字也

### 崔秉鏡

崔秉鏡字去塵號冰菴寧德人順治十四年舉人知浙江寧海縣縣多曠土招徠墾闢流亡以集然後振文風

清積弊革耗羨聽訟明允民愛戴之康熙十三年耿逆之變閩浙騷動邑當孔道糗糧芻茭往來絡繹加以山寇海盜乘間竊發邑中奸宄潛煽訛言秉鏡誓衆固守內剿劇賊外捕洋盜通水陸要道以運糧毀城外河橋以斷賊之來路泊大師競進掃除逆賊浙土蕩平而蔽障東南寧海得不遭兵燹秉鏡之功居多賊平力請賑粟復捐俸以贖盜所擄天台仙居二縣男女二百五十口民爲立祠以功遷北城兵馬司正指揮攝西城士民遮道泣送繪攀轅圖以志去思後年老乞歸道經舊地民迎送數十里外抵家甫兩月卒祀寧海名宦祠有名

宦錄所著洗心堂集勺園雜詠勺園近草今佚子讓汧以孝稱

藍理

藍理字義甫漳浦人少桀驁力舉八百鈞足及奔馬曳其尾倒行初業染咤曰大丈夫業此耶遽破缸去時海寇盧質擁衆岱嵩井尾間理往與之鬪殺質揮其衆曰降者免皆降其黨王都潛出剽掠理詣郡獻功當事因疑爲賊逮於獄康熙十三年耿精忠叛悉縱繫者令授職理曰我豈從賊之人哉間道出仙霞關聞康親王統大師討逆迎之具陳平閩策親王令爲前導破僞都督

曾養性於温州授松溪營遊擊又從都統賴塔敗海賊於蜈蚣山復長泰縣遷灌口營參將又從提督楊捷擊賊將何佑於烏嶼大敗之閩督姚啟聖駐漳州籌海劾理虛兵冒餉奪職理請勦海寇自贖是時鄭氏父子竊踞澎臺數侵擾泉漳爲邊患靖海將軍施琅奉

命往征琅知理彪勇請隨歸權遊擊領前隊先鋒先是賊帥劉國軒據澎湖僞將曾遂以數萬衆迎敵理偕遊擊曾戚率師自朝至日中戰益力忽賊砲斜飛穿理腹仆曾遂呼曰藍理死矣理弟瑤自後掖理起理空拳大呼曰藍理在連呼殺賊聲如雷舟中軍士皆奮起又呼

從子法持刀法持刀見理腹已破腸外流掬而納之弟  
瑗傳以衣弟珠持匹練束之時賊舟持我舟急鈎以鐵  
鈎火箭火龍火罐彼此互擲煙燄蔽天賊中有飛天鼠  
者緣大桅而上伏篷陰啣刀捫繩負篷立羣賊轉篷突  
持刀下瑤揮刀斬之賊膽喪理命以火藥盡傾賊舟燔  
賊無數復沈其二舟賊大敗逐北數十里施琅大喜疏  
理首功親至慰勞命紅夷醫療之醫言七日勿動氣乃  
可復施琅曰大功已成安臥十日可也翼日琅督師出  
戰戒左右勿使理知琅舟爲沙所膠不能動賊悉銳圍  
之謀者飛報左右秘不言理察有異拔劍問故卽駕舟

往左右弗能止賊望見篷上書字驚曰藍理來矣遂退  
理追擊敗之奪賊舟請琅登琅執手勞曰醫言須七日  
何亟也於是乘勝殺賊賊大敗窮追至西嶼頭賊退守  
壘不敢出琅復疏上理功數日削平復與琅出輕師以  
擾之賊數敗首尾不相顧鄭克塽懼遣使納降臺灣平  
上以理血戰破敵功加左都督參將而理以親老乞  
歸省未幾丁父艱服闋八都迎

駕趙北口

上問是征澎湖拖腸血戰之藍理否

召至前視傷痕

溫旨慰之授陝西神木副將

賜帑金三百兩擢宣化府總兵挂鎮朔將軍印後以海洋多盜調浙江定海鎮十餘年以奏閩省軍功蔡明等被議

上念其功移天津鎮

賜孔雀翎理以畿輔產米無多而天津皆平原沃衍可濬河引水灌稻田率兵疏鑿市牛種農具募民耕種得水田百五十頃歲收稻穀

上俱以賜理未幾遷福建陸路提督以其弟珠赴天津治營田事理至閩以巨盜陳五顯事發奪職旋爲總督

福建通志列傳補編

十四

范時崇閩撫覺羅滿保所劾

上命侍郎覺羅和托廖騰燧案覆得實論斬

上念舊功免死追贖八萬後以征西藏策妄阿喇布坦命軍前效力

賜總兵銜從都統穆賽經理北路有進戰退守移營就糧諸議皆合機宜以病回京卒年七十二

上免所追贖遣家屬回籍歸葬弟瑗福建金門總兵官珠參將英勇與理埒而好學聰敏能背誦朱子綱目不遺一字

廖騰燧